

Guiscardi filium, Siciliae Regem, instruxere. Is Hidruntino portu profectus cum valido exercitu in Corcyram insulam venerat, quæ Hadriatici maris confinium est & Ionii. Ea Rogerius armis potitus, in Peloponnesum transmisit: ubi circa Maleæ promontorium, inter Argolicum Laconicumque sinum, multa hostiliter gessit. Inde classe in Saronicum sinum delatus, circa Cenchreas Corinthiacum navale, circumjectum agrum ferro ignique fœde populatus est. Progreffus inde, quia neminem interea obvium habuit, ad Isthmum (quem hodie vulgus *Heximilon* vocat) terrore & populationibus omnem Achajam complevit. Thebas quoque bello captas diripuit, ubi crudelissimam in quærendo auro exercuisse dicitur avaritiam. Demum neque Eubojos fines, neque eam Boetiæ oram, quam Phocidem vocant, inviolatam reliquit. Præsenti itaque rerum successu elatus Rogerius, ex purpuratis unum cum sexaginta longarum navium classe, per Hellespontum ad Bosphorum usque Thracium misit: estque res ita impigre a Siculis circa Byzantium gesta, ut ædificia urbi contigua ardentium sagittarum jactu, ab iis qui in navibus erant, missarum conflagrasse dicantur. Rebus imperii in hunc modum accisis, Emanuel ad Venetorum opes per legatos confugerat: a quibus jure vetustæ amicitiae petere non dubitavit, ut rebus suis afflictis succurrerent: aut si sero id petatum esset, acceptam ulciscerentur injuriam. Valida itaque classis decreta est: qua in portum deducta, Polanus Princeps confestim in hostes movit, revocatis prius publico decreto aliquot longis navibus, quæ tum foris erant. Sed quando illæ domo profectæ essent, scriptores quos vidimus non tradunt: puto eas fuisse, quas ad tuendam Syriæ oram Veneti se perpetuo circum loca ipsa habituros Balduino, ut quidam tradunt, ab initio polliciti erant. Interim classis, quæ nuper Venetiis deducta erat, aliquantisper tempestate jactata, Caprulanum portum in Carnorum ora tenuit. Hic adversa valetudine quum Polanus laborare cœpisset, atque in dies magis gravante morbo, cerneret haud tam cito se convalesciturum, Joanne fratre & Rainerio filio classi præfectis, Venetias est